

Per i gl 85avel anniversari da Giusep Berther, tagliacrappa

Norbert Berther

Il 27 d'october 1998 festivescha Giusep Berther-Valier ella Casa S. Vigeli siu 85avel onn. Per quei anniversari gratuleschel jeu ad el cordialmein giavischond ad el vinavon ina biala sera dalla veta. Era sche las combas mudregian el empau, eis el aunc bein en gamba, specialmein da spért. El ha ina excellenta memoria e sa raquintar interessants schabetgs dad onns vargai. Jeu sundel perquei staus tier el per saver scriver enzacontas lingias per questa periodica. Quei che ha interessau mei in emprema lingia ei siu mistregn da tagliacrappa, ina professiun nunusitada tier nus ed il Giusep ei in dils paucs Tuatschins che ha elegiu quella clamada. Perquei sundel jeu seconcentraus specialmein sin quei camp. Davart sia veta dattan las notizias alla fin ina cuorta survesta.

Sco quei che Giusep Berther manegia, ei il mistregn da tagliacrappa vegnius enconuschents tier nus entras la construcziun dallas punts dalla Viafier Furca-Alpsu l'entschatta da quei tschantaner. Aunc oz san ins admirar quels loschs edifecis cun la crappa beintagliada probabel da luvriers talians. En Tujetsch vegnevan ils mirs dallas casas e dils nuegls fatgs avon cun crappa buca tagliada anflada ella natira e cun caltschina viva.- Staus orda scola sedecida il giuven da Gonda

d'emprender tagliacrappa tier Remigio Locatelli, in vischin da Domodossola che luvrava da gliez temps en Tujetsch. El fa la scola professiunala a Cumpadials, nua ch'el mava cun velo il temps da terren. Suenter gl'empredissadi da treis onns s'engascha Giusep tier la gronda firma Antonini a Göschenen, ina gronda interpresa cun ver 50 luvriers. Suenter quella pratica nizeivla retuorna el a casa e lavura sur sesez ensemen cun siu frar Gaudenz. (Lez ei pli tard seretratgs a Tumejl e figurescha aunc oz el cudisch da telefon sco «Steinhauer»). Il 27 d'october 1998 dus frars tagliacrappa per far mirs, scalems e plattas per scalas, begls etc. Aschia seregorda il giubilar d'haver preparau la crappa per las scalas da Toni Hendry-Monn, Luis Hendry-Berther e da Leci e Baseli Deflorin a Camischolas, resp. Zarcuns. Loschs eis el era dalla fontauna amiez Camischolas e dil mir dil santeri. Sco emprendist tier Locatelli ha el era gidau a tagliar la crappa per la tuor-baselgia da Rueras. La gronda part da quella crappa ei vegnida explotada si Parvéchel (sur la casa da Giachen Martin Caduff). Auters loghens da crappa eran specialmein Plaun Pardé, Gionda (pastira da Camischolas) e Valtgeva. En quels loghens deva ei detgavunda da quella rauba, mo buca tutta era buna. Il granit stueva esser cumpacts, senza ruosnas e fessas ed

Il tagliacrappa dalla
firma Antonini a
Göschenen 1931.



haver aveinas per saver fender bein el. Era il crap elegius vegneva ei fatg il plan co fender el, tut tenor igl intent. Tut vegneva fatg a maun! La puorla ei vegnida en usit pér pli tard. Igl εμπrem fageva il taglia-crappa enzacontas ruosnas en ina lingia directa cun puntga e mazot (marti). Lu metteva el en quelas enzacons cugins d'itschal e deva sin quels cun in mogn. Ussa severificava ei, schebein la qualitat dil granit era buna ni buca. Suenter treis fridas sin mintga cugn stueva il crap sefender, schiglioc era ei buca si l'aura! Suenter che la crappa era fessa all'engronda, vegneva ella tagliada tenor intent. Il transport era caussa dil client. Quei era ina lavur heiclia e fadigiusa, il bia cun cavagl e targliun, pli tard cun tship.

Scalegl

Remigio Locatelli, igl εμπrem patrùn da Giusep Berther, tagliava buca mo granit, mobein era scalegl. Era siu εμπrendist ha empriu quella tecnica ed ha era sco sorprendider fatg differen-

tas pegnas en Tujetsch. El sa per exempel seregurdar da quellas ellas stivas da Vigeli Valier-Berther a Camischolas (oz da Walter Monn-Berther) e dad Onna Maria Derungs-Jacomet, Sedrun (oz da Maria Luisia Jägler). Il scalegl vegneva explotaus sil Calmut, nua ch'el ha giu la lubientscha corrispundenta dalla vischnaunca. Quei crap era da tut outra natira che quella dil granit, bia pli loms e cheutras megliers d'elaborar. Denton era cheu duvrava ei in bien egl per eleger la dretga tocca ed era in bien inschign da tagliar ella. Il transport succedeva cheu pressapauc tuttina sco tier il granit. Il scalegl ei fatg adattaus per pegnas, damai ch'el recepescha per liung temps la calira dil fiug. Las pli veglias pegnas scalegl dateschen dil 18avel tschentaner. Avon era il material da crap. Giusep Berther sa aunc seregurdar d'ina pegna-crap ella stiva dad Ignaz e Vigeli Soliva da Gonda.- Damai che la crisa economica da gliez temps sefageva era valer en Tujetsch e la concorrenza muncava

medemamein buca, han ils dus frars Giusep e Gaudenz renunziàu a lur interpresa che ha cuzzau naven da 1933 entochen 1937. Ei eri memia pauc per viver e memia bia per murir, ha il Giusep manegiau tier nies discuors. El s'engascha puspei sco luvrer. Pressapauc 1945 ha el denton puspei la pusseivladad da luvrar dil tutfatg en siu mistregn, numnadamein sco cau dalla fabrica da scalegl sper il Drun gest sur la lingia dalla viafier Furca-Alpsu (oz casa da colonias dad Irma Wirth-Monn). Suenten in per onns sto la fatschenta, «Ovras da pegnas da Tujetsch, SALangenthal» denton serrar las portas per motivs finanzials. Tenor meini da Giusep Berther eri il curdem dil scalegl explotaus medemamein sil Calmut memia gronds, aschia ch'il transport cun la viafier vegneva memia cars. Ins havessi stuiu elavurar il material pli fetg sil plaz dall'explotaziun sez.

Cuorta biografia

Naschius ils 27 d'october 1913 sco emprem feagl da Vigeli Berther (1887-1973) e da Mariuschla Berther-Schmid (1886-1970). Frequentau la scola primara a Sedrun tier Gion Antoni Schmid (siu aug Tona), Tumaisch Venzin e Gion Michel Peder, la secundara a Camischolas tier Sep Mudest Nay. Seregorda bugen dallas scartas uras da gimnastica, dil mesirar praus e dalla instrucziun davart tagliar pustretsch. La primavera e la stad segidaus el menaschi puril da casa, fatg vadler, nurser, purtger e paster en differentas alps. En schliata memoria la stad sco purtger en Val Giuf pervia dil catschar ils pors mintgadi naven da Mulinatsch si Culmatsch cura che la caschada era leu. Ina mendra stad che quella da recrut! Schliatas regurdientschas era dallas miserablas tegias d'alp. Staus orda scola emprendissadi da tagliacrappa, lavura suenter in per onns pratica sur sesez, vegn lu engaschus sco capo dalla fabrica da scalegl e lavura lu suenter tier differentas firmas, specialmein tier il Murer, il davos tier l'Ovra electrica da Tujetsch. Denteren dabia militar, specialmein duront il temps d'uiara. Sper la lavur professionala era teniu in per cauras e nuorsas. Marida 1947 la giuvna Ludivina Valier da Camischolas. 1948 naschientscha dalla feglia Marta. Baghegia casa 1972. Mort dalla dunna 1991. Sper la lavur da mintgadi era s'engaschus en differentes uffecis, sco



La casa paterna da Giusep Berther. Enamiez la scala crap fatga dils frars Giusep e Gaudenz Berther. Oz ei la casa da Tullio Dal Farra en quei liug.

p. ex. president dalla Corporaziun digl acquaduct s.Gions ed ugau da differents persunas. Staus 44 onns ella Societas da musica. Trochist passianau, enquera congiugadurs. Dapi 1995 ella Casa S.Vigeli Sedrun.

4a - 8a classa primara a Sedrun 1926. 45 scolaras e scolars! Enamiez il plevon Giachen Antoni Fetz, ed il scolast Gion Michel Peder. Il Giusep Berther ei il tierz buob seniester dil plevon ell'emprema retscha.



Sis cuserins «Vigeli piners» ella musica, entuorn 1960. Da seniester a dretg: Emanuel, Ignazi (da Gion Battesta), Stanislaus, Ignazi (da Vigeli) e Giusep.



Sentupada dall'annada 1913 gl'uost 1959. Da seniester a dretg,

emprema retscha: Leonard Loretz, Maria Pfiffner-Schmid, Catrina Berther-Berther, Ludivica Deflorin-Venzin, Rosa Monn-Hendry, Maria Deragisch-Derungs, Gion Caduff.

secunda retscha: Toni Berther, Cristian Cavegn, Stiafen Caduff, Placi Deragisch, Gion Alois Beer, Giusep Berther, Gion Crisost Caduff

